



Cussegl da vischnaunca 2021/2024

Protocol no. 21

Seduta dils 18-04-2023

Protocol

dalla seduta dil cussegl da vischnaunca,
mardis, ils 18 d'avrel 2023, allas 19³⁰ – 23⁰⁰
Liug: Halla Cons

Presidenta: Helga Probst-Linder

Actuara: Ursina Murer-Fatzer

Presents:

a) Cussegl	Armin Berther Theres Burri Gadola Silvia Bucheli-Caduff Roland Cajacob Adrian Deflorin Edgar Durschei Adrian Flepp	Mario Flepp Otmar Flepp Remo Huonder Giusep Lozza Armin Manetsch Ignaz Venzin
------------	--	--

Perstgisas: Larissa Fry Schuster

b) Suprastonza comunala	René Epp Clemens Berther Wendelin Jacomet	Jris Lombris Paul Flurin Schmidt
----------------------------	---	-------------------------------------

c) Envidai	<i>Solar Alpin Disentis:</i> Dr. Ruedi Kriesi, Kriesi Energie GmbH, Wädenswil René Meier, Fanzun AG, Cuera
------------	--

Uniun la pendentia:
Christian Loretz, Segnas

d) Hosps:	17
-----------	----

Negin plaid d'avertura dalla presidenta dil cussegl da vischnaunca

La presidenta dil cussegl supplichescha cusseglier(a)s da risguardar suandontas reglas:

1. sebasond sin art. 28 al 2 dil regulativ da fatschentas astgan cusseglier(a)s per tractanda prender il plaid sil pli bia treis gadas;
2. plinavon vegn supplicau d'inoltrar las propostas a scret per ina votaziun correcta.

Mortoris

Dapi la davosa seduta dil cussegl da vischnaunca ha ei dau sis mortoris:

- Gisela Bigliel, naschida ils 20-07-1966, morta ils 04-02-2023
- Franzisca Monn-Maissen, naschida ils 31-08-1927, morta ils 07-02-2023
- Alice Maissen-Jacomet, naschida ils 30-08-1945, morta ils 08-02-2023
- Rudolfin Lechmann-Senn, naschius ils 04-05-1927, morts ils 09-02-2023
- Moritz Arpagaus, naschius ils 09-09-1927, morts ils 09-02-2023
- Urs Häfliger-Millane, naschius ils 26-02-1937, morts ils 04-03-2023

Naschientschas

Dapi nossa davosa seduta dil cussegl da vischnaunca ha ei dau treis naschientschas:

- Mauro ed Enea Flepp, naschi ils 03-02-2023, fegls da Tamara Levy e Livio Flepp
- Pia Selina Flury, naschida ils 10-03-2023, feglia da Carla e Martin Flury

Tractandas:

1. Protocol 20-2021/2024
2. Solar Alpin Disentis: Credit per giudicament dil liug (messadi 33-2021/2024)
3. Protocol dil cussegl da vischnaunca: Nova applicaziun davart la redacziun dil protocol
4. Lescha da pumpiers: Revisiun totala e statuts Pumpiers Sursassiala: Revisiun parziala (messadi 34-2021/2024)
5. Project "la pendenta": Contribuziun finanziaria (messadi 35-2021/2024)
6. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér
La presidenta: L'actuara:

Helga Probst-Linder

Ursina Murer-Fatzer



Cussegl da vischnaunca 2021/2024

Protocol no. 21

Seduta dils 18-04-2023

1. Protocol 20-2021/2024

Decisiun:

Il protocol nr. 20 dalla seduta dils 27 da schaner 2023 vegn approbaus unanimamein.

Remarca: La seduta dils 10 da mars 2023 ha buca giu liug.

Cussegl da vischnaunca Disentis/Mustér
La presidenta: L'actuara:

Helga Probst-Linder

Ursina Murer-Fatzer



Cussegl da vischnaunca 2021/2024

Protocol no. 21

Seduta dils 18-04-2023

2. Solar Alpin Disentis: Credit per giudicament dil liug

(messadi 33-2021/2024)

Presentaziun

Gerau Clemens Berther presenta il project Solar Alpin Disentis. Il project preveda in implont fotovoltaic all'Alp Run tenor messadi 33-2021/2024.

Ils representants dalla cuminonza d'interess "IG Solalpine", Dr. Ruedi Kriesi e René Meier retscheivan il plaid da genau Clemens Berther per saver presentar ils fatgs da planisaziun. *La presentaziun vegn aschuntada al protocol.*

Ei suonda la debatta d'entrada.

Cussegl:

Per retscheiver in credit da frs. 119'000.-- basegna ei differentas contractivas denter la Societad sempla Alp Run e la vischnaunca. La suprastonza ha da procurar che buca mo la vischnaunca ha da surprender la resca finanziaria dil mument ch'il project vegn buca realisau. Plinavon vegn rendiu attent da stipular en in contract la participaziun dalla vischnaunca vid il rap solar annual.

Bugen spetga il cussegl rispostas davart il masterplan sco era la valetaziun davart la realisabladad da quei project. Sch'ils responsabels vesan ordavon ch'il project vegn p.ex. retardaus entras protestas ni che la realisaziun ei periclitada per tgei motivs era adina, ei da desister a temps dil project.

Gerau Clemens Berther:

Grazia agl engaschi dils responsabels dalla Societad sempla Alp Run ha la vischnaunca la pussevividad d'insumma separticipar ad in tal project. In grond avantatg ei medemamein che 13 ovras electricas han exprimiu lur interess vid il project. La procedura d'offerta vegn pér instradada e cheutras ein era aunc negins contracts definitivs avon maun.

Sco igl ei vegniu informau mass denter auter igl uaul da schurmetg en proprietad dalla Societad sempla Alp Run vi en possess dalla vischnaunca, quei che fuss da grond avantatg a vesta d'ina tgira efficienta digl uaul. La vischnaunca ha grond interess da surprender uaul per agen possess e cheutras saver garantir la segirtad da nos habitadis.

Dr. Ruedi Kriesi:

Il masterplan ei avon maun e realistics. La resca principala ei l'inoltraziun d'eventualas protestas. Il proxim pass ei d'anflar il discuors persunal cun las organisaziuns d'ambient per evitar in'unda da protestas. La furniziun da material ei cumbinada cun ina cert risico. La resca ch'ils 13 interessents seretilien ei pintga. Segirefranc vegn buca mo in'interpresa a surpender il tgamun, mobein ei vegn a dar ina cuminonza da lavur (ARGE). Pil mument san ins observar il plan da termins. Sche l'inoltraziun dil project succeda pér suenter la fin digl onn 2025, vul quei buca dir ch'ins sa buca pli realisar el. Sulettamein la contribuziun da subvenziun vegness sminuida. Actulamein vegn igl indrez fotovoltaic all'Alp Run subvenziunau cun 60%.

Ei suonda la deliberaziun en detagl.

Proposta

Cusseglia Edgar Durschei propona da cumpletar la proposta dalla supracomunala sco suonda:

"2. Cun la cundiziun che la vischnaunca elabora sco cunterprestaziun in contract da participaziun da silmeins 30% vid il rap solar annual che la Societad sempla Alp Run survegn (analog alla taxa da plivalur "Mehrwertabgabe" tier enzonaziuns da terren). Quei contract sto esser avon maun tier la tractaziun dalla damonda da baghegiar.

Decisiun

Cun 11 encunter 0 vuschs (3 abstenziuns) sustegn il cussegl la proposta da cusseglier Edgar Durschei.

Decisiun:

Sin fundament dallas ponderaziuns menziunadas conceda il cussegl da vischnaunca unanimamein:

- **in credit da frs. 119'000.-- (+/- 10% incl. TPV) per la realisaziun dalla secunda fasa dil project Solar Alpin Disentis che cumpeglia il giudicament dil liug;**
- **cun la cundiziun che la vischnaunca elabora sco cunterprestaziun in contract da participaziun da silmeins 30% vid il rap solar annual che la Societad sempla Alp Run survegn (analog alla taxa da plivalur "Mehrwertabgabe" tier enzonaziuns da terren). Quei contract sto esser avon maun tier la tractaziun dalla damonda da baghegiar.**

Cussegl da vischnaunca Disentis/Mustér
La presidenta: L'actuara:

Helga Probst-Linder

Ursina Murer-Fatzer



3. Protocol dil cussegl da vischnaunca: Nova applicaziun davart la redacziun dil protocol

Presentaziun

Presidenta dil cussegl da vischnaunca Helga Probst-Linder:

"A caschun d'ina seduta dil biro dil cussegl da vischnaunca ensemen cul president communal René Epp ei vegniu discussiunau davart ina nova applicaziun da redegger ils protocols e quei sco suonda:

- *En connex cun la tractaziun d'ina fatschenta propona il biro dil cussegl da vischnaunca da sulettamein aunc far menziun dil num da cusseglier(a)s tier concretas propostas. Tier la discussiun generala enteifer la tractaziun d'ina fatschenta duei mo pli vegnir protocolau ina resumaziun digl essenzial dalla discussiun. Ils differents votums duein buca pli vegnir protocollai cun num.*
- *Quei per suandonts motivs:*
 - *Il temps dalla redacziun dil protocol vegn entras quella decisiun scursanida massivamein.*
 - *Ils messadis vegnan gia preparai dalla suprastanza communal detagliadamein, aschia ch'ei tonscha dad haver protocolau el futur mo pli ina resumaziun digl essenzial dallas discussiuns, las propostas e decisiuns finalas.*
 - *Plinavon quenta il biro dil cussegl da vischnaunca da tut tenor situaziun saver reducir empau il temps da tractaziun, quei en vesta ch'ils nums vegnan mo pli protocollai tier concretas propostas.*
 - *Tut en tut duei quella proposta promover ch'il menaschi dil cussegl vegni el futur pli speditivs ed efficientes".*

Proposta

Tenor artechel 46 dil regulativ da fatschentas propona il biro dil cussegl da vischnaunca da mo pli protocollar igl essenzial dallas discussiuns, las propostas e decisiuns. Tier propostas concretas vegn vinavon fatg menziun dil num dalla cussegliera ni dil cusseglier.

Decisiun:

Sin fundament da sura ponderaziuns decida il cussegl da vischnaunca unanimesamein d'introducir la nova redacziun dils protocols dil cussegl da vischnaunca.

Cussegl da vischnaunca Disentis/Mustér
La presidenta: L'actuara:

Helga Probst-Linder

Ursina Murer-Fatzer



Cussegl da vischnaunca 2021/2024

Protocol no. 21

Seduta dils 18-04-2023

4. Lescha da pumpiers: Revisiun totala e statuts Pumpiers Sursassiala: Revisiun parziala (messadi 34-2021/2024)

Presentaziun

Gerau Paul Flurin Schmidt presenta la revisiun totala dalla lescha da pumpiers sco era la revisiun parziala dils statuts dils Pumpiers Sursassiala tenor messadi 34-2021/2024.

Negin giavischa il plaid tier la debatta d'entrada. Ei suonda la deliberaziun en detagl.

Cussegl:

Il cussegl supplichescha da risponder sin fundament da tgei datas ch'il diember minimal da 10 pumpiers resulta. Plinavon era l'intenziun primara dalla revisiun dalla lescha e dils statuts d'instradar ina contribuziun da basa independentamein dil diember da habitonts ni dalla valeta d'immobillas, cun quei che l'infrastructura dils pumpiers sto esser avon maun per tuttas treis vischnauncas. La taxa da cumpensaziun vegn alzada da frs. 500.-- sin frs. 600.--. Sch'ina vischnaunca ni l'autra augmenta la taxa han las autras era d'alzar quella?

Gerau Paul Flurin Schmidt:

Las vischnaunca da Medel/Lucmagn e Tujetsch han aunc buc'approbau la nova lescha ed ils statuts dils Pumpiers Sursassiala. Per quels motivs ein gerau Werner Venzin e geraua Nicole Gioiosi oz cheu presents. Il cussegl da vischnaunca da Mustér fa igl emprum pass. La lescha sco era ils statuts entran en vigur el mument che tuttas treis vischnauncas han approbau ils documents numnai. L'Assicuranza d'edifecis GR (GVG) sebase sil diember da habitonts sco era sin la valeta dallas immobillas en vischnaunca. Sin fundament da quellas datas ha l'Assicuranza d'edifecis GR definiu il diember minimal da 10 pumpiers. Il model d'instradar ina contribuziun da basa ha la vischnaunca da Medel/Lucmagn buca saviu sustener. Cheutras ei il model present la megliera sligiazion per tuttas treis vischnauncas. Sch'ins risguarda il diember da habitonts da Medel e la valeta dallas immobillas, vales per Medel mo in diember da quater pumpiers q.v.d Medel paga indirectamein ina pli aulta contribuziun cul model present che preveda la minimala da 10 pumpiers. Quei fatg vala era per la vischnaunca da Tujetsch (30 pumpiers). La taxa da cumpensaziun sto buca vegnir alzada en tuttas vischnauncas, sch'ina vischnaunca concluda in augment.

Decisiun:

Il cussegl da vischnaunca approbescha cun 13 encunter 0 vuschs (ina abstenziun):

- 1. la revisiun totala dalla lescha da pumpiers;***
- 2. la revisiun parziala dils statuts Pumpiers Sursassiala;***
- 3. da suttametter la revisiun totala dalla lescha da pumpiers sco era la revisiun parziala dils statuts Pumpiers Sursassiala al referendum facultativ tenor art. 21 lit. b dalla costituziun communal.***

Cussegl da vischnaunca Disentis/Mustér

La presidenta:

L'actuara:

Helga Probst-Linder

Ursina Murer-Fatzer



Cussegl da vischnaunca 2021/2024

Protocol no. 21

Seduta dils 18-04-2023

5. Project "la pendentia": Contribuziun finanziaria (messadi 35-2021/2024)

Presentaziun

Il president communal René Epp presenta il project dalla punt "la pendentia" tenor messadi 35-2021/2024.

Ei suonda la debatta d'entrada.

Cussegl:

La vischnaunca ha pagau entochen ussa frs. 90'000.-- per la planisaziun dil project. Sunter la realisaziun dalla punt daventa la vischnaunca possessura e surpren cheutras igl entir manteniment dalla punt. Pigl engaschi prestau enfin oz, admetta il cussegl all'uniun "la pendentia" in sincer engraziament.

Ei suonda la deliberaziun en detagl.

Cussegl:

Ei vegn rendiu attent alla differenza davart la contribuziun dil maun public che muntava tenor brochura dall'uniun "la pendentia" frs. 400'000.-- ed ussa tenor messadi rodund in milliun francs. Plinavon muntava la cumpart dallas fundaziuns 17%. Quella ei ussa sminuida sin 8%. El messadi ein las differenzas buca vegnidas motivadas. La trasparenza digl entir agir maunca. Il credit munta bunamein in miez milliun francs, quei che havess per consequenza che la damonda mass alla votaziun all'urna. Era il plan d'investiziun prevedeva negin credit per la punt.

President communal René Epp:

Las finamiras da recaltgar daners per la punt tier privats han ils iniziants survaletau. Senza il maun public sa in tal project buca vegnir realisau. Il cantun Grischun sustegn il project cun rodund in miez milliun francs. Cheutras ei la cumpart d'investiziun da 25% dalla vischnaunca vid il project mudesta. Ch'ils iniziants han mo pli da recaltgar 8% ei da valetar positiv pertgei ch'ins ha recaltgau dapli daners tiels privats. Per buca retardar il project propona la suprastanza da dar suatientscha alla damonda da credit da frs. 390'000.--.

Il preventiv d'investiziun futur duei ton sco pusseivel mo pli cuntener projects che vegnan realisai egl onn proxim. Cunquei che l'uniun fa l'investiziun dalla punt, sto quella summa buca vegnir menziunada el plan d'investiziun dalla vischnaunca. La contribuziun à fonds perdu dalla vischnaunca vegn integrada el quen da gudogn e sperdita.

Proposta

Cussegliera Theres Burri Gadola propona:

- **da conceder in credit per la realisaziun dil project "la pendentia" da maximalmein frs. 290'000.-- (plafonament dils cuosts) cun suttammer quel al referendum facultativ conform ad art. 21 lit. c dalla constituziun communal.**

Decisiun

Cun 11 encunter duas vuschs (ina abstenziun) refusescha il cussegl la proposta da cussegliera Theres Burri Gadola.

Decisiun:

Sin fundament dallas ponderaziuns menziunadas conceda il cussegl da vischnaunca cun 12 encunter duas vuschs:

- 1. il credit per la realisaziun dil project "la pendentia" da maximalmein frs. 390'000.-- (plafonament dils cuosts) cun suttametter quel al referendum facultativ conform ad art. 21 lit. c dalla constituziun communal;**
- 2. in aconto ell'altezia da frs. 140'000.-- per la planisaziun el mument che la lubientscha da baghegiar ei avon maun e che la decisiun davart la contribuziun communal ha vigur legala;**
- 3. pren enconuschientscha che la vischnaunca da Mustér vegn a surprender il menaschi ed il manteniment dalla "pendentia" suenter la realisaziun ed inauguraziun da quella.**

Cussegl da vischnaunca Disentis/Mustér
La presidenta: L'actuara:

Helga Probst-Linder

Ursina Murer-Fatzer



Cussegl da vischnaunca 2021/2024

Protocol no. 21

Seduta dils 18-04-2023

6. Ura da damondas (conform ad art. 44 dil regulativ da fatschentas)

Cusseglhier Mario Flepp:

Dapi entgins onns ei la punt da Sogn Placi vegnida sanada. Deplorablamein ein las restonzas dalla punt veglia aunc adina visiblas e buca vegnidas allontanadas. Quei procura buca gest per in bien maletg dil vitg.

President communal René Epp:

Ils responsabels prender per enconuschientscha dalla menziun.

Communicaziuns

President communal René Epp:

1) Sanadad en general e problematica da miedis da casa en special

La problematica dalla successiun e dil manco da miedis da casa ei enconuschenta e per nossa vischnaunca, per la regiun ed il cantun en general ina gronda sfida. Plinavon drova ei pil survetsch d'urgenza medicinal in descargament e la purschida dil survetsch d'ambulanza munglass esser garantius da tut temps aschia che l'ambulanza ei en cuort temps al liug d'urgenza. La munconza da personal ei omnipresenta. Buca mo tier nus. Era el Spital regional Surselva. Leu ei la situaziun actualmeins fetg drammatica. Ed el futur vegn ei buca pli simpel. Perquei dat ei nuot auter ch'ina stretga collaboraziun el sector da sanadad e quei da e cun tut ils purtaders da prestaziun. La Sana Surselva ch'ei l'organisaziun regiunala (corporaziun dallas vischnauncas dalla Surselva ch'ei responsabla da garantir da tut temps in provediment adequat da sanadad en Surselva) ei dapi igl onn 2020 lundervi d'elaborar il project «Reit da sanadad Surselva – Gesundheitsnetz Surselva». La finamira dil project ei d'augmentar la qualitat e da segirar a liunga vesta il provediment da sanadad ella Surselva. La firma specialisada KPMG (cussegliazion d'interpresas) ei - en stretga collaboraziun cun las instituziuns el sector dalla sanadad sco era cun representants dalla politica - vid examinar ils davos detagls per contonscher l'aula finamira da reunir ils differents purtaders da prestaziun tier in'organisaziun regiunala. El decuors dils proxims meins ei previu ch'ils differents purtaders da prestaziun decidien davart in'eventuala participaziun alla nova societad regiunala che duei vegnir fundada igl onn 2023. La problematica dalla munconza dils miedis da casa resta denton vinavon. Sin iniziativa privata dils responsabels dil center da sanadad Vitasphère ha la suprastonza communal cun entgins representants dil cussegl da vischnaunca ed ulteriurs interessai visitau la pratica communal da miedis ad Oensingen. La viseta ei stada fetg emperneivla ed ei ha dau massa bunas ed interessantas informaziuns. La suprastonza communal ei stada perschuada che quei savessi era esser ina via pusseivla per nossa vischnaunca resp. nossa regiun. Buca ditg suenter la sentupada ha la suprastonza communal survegniu en in scriver las claras e buca discutablas pretensiuns dils iniziants, el cass ch'els vulessen realisar ina pratica semeglionta en nossa regiun. Las pretensiuns ein stadas memia aultas. Sper grondas summas d'investiziun ei vegniu pretendiu in'aula contribuziun vid il menaschi annual sco era negina pusseivladad da seser el gremi strategic dalla nova societad che fuss vegnida fundada. Sut quellas diras cundiziuns eisi buca stau pusseivel da dar suatientscha a quella pusseivla via. Plinavon havess ei duvrau en nossa vischnaunca ina lubientscha extraordinaria pils miedis da casa d'astgar dar ora medicaments, in'aschinumnada autodispensaziun. Quei fuss denton mo stau pusseivel sin via politica, sin palancau cantunal ni entras beinvulientscha dall'Apoteca Desertina. Muort la situaziun drammatica d'insumma anflar miedis da casa, mo era ord auters motivs, ein la fin finala era ils responsabels da Vitasphère buca pli stai aschi perschuidi da realisar in tal project en nossa regiun. Consequentamein ha la suprastonza communal - sin clara incumbensa dil cussegl da vischnaunca - mirau vinavon per sligiazions e decidiu da perseguir ina pusseivla via cun

l'organisaziun Puntreis. Actualmein essan nus en stretg contact cun ils responsabels da Puntreis per mirar tgei pusseivladads ch'ei avon maun per crear in center da sanadad che porscha el futur el sector da sanadad ina purschida cumplexsiva. En buca ditg vegn ad haver liug ina sentupada communabla dalla suprastonza communal ed ils cussegls d'administraziun dalla fundaziun e dalla societad acziunara per haver endamen davart bunas, innovativas e persistentas slihaziuns, las qualas duein vegnir realisadas ton pli spert. La suprastonza communal ei intenziunada da porscher maun leu nua ch'igl ei pusseivel per communablamein cun la Puntreis saver scaffir las premissas e da porscher las cundiziuns generalas necessarias per gudignar el futur miedis da casa en nossa vischnaunca ed ella regiun. Nus vegnin ad informar el decuors dallas proximas sedutas dil Cussegl da vischnaunca davart igl andament dallas contractivas.

2) Engaschi Tino Cadruvi

La piazza publicada d'emprendissadi naven dalla stad 2023 ha muort munconza d'annunzias deplorablamein buca saviu vegnir occupada. Bugen saiel jeu informar oz il cussegl da vischnaunca che nus havein saviu gudignar Tino Cadruvi per in engaschament temporar dad 11 meins, suenter ch'el ha absolviu siu emprendissadi. El vegn cunzun a sefatschentar cun incaricas supplementaras specialas sco p.ex. il niev sistem per lubientschas da carrar, las novas taxas fundamentalas da rumien e l'introducziun dil sistem da controlla intern, igl aschinumnu IKS. Nus havein plascher e selegrein sin ina buna collaboraziun.

3) Acla da Fontauna

Bugen informeschel jeu oz il cussegl da vischnaunca che la suprastonza communal ei en stretg contact cun ils investurs dil project dil Hotel Acla da Fontauna. Ellas proximas jamnas vegn ensemen cun la vischnaunca da Mustér communicau ella pressa davart il stan actual dil project. Plinavon vegn in'agentura specialisada ad entscheiver a commercialisar las habitaziuns. Era ei previu da dar ina survesta completa ella proxima gasetta "Detg denter nus" per informar la populaziun davart il stan actual.

La suprastonza communal ha ultra da quellas informaziuns grond plascher d'astgar comunicar oz al parlament communal da reservar suandonts dus impurtonts termins:

- **Sonda, 26 d'uost 2023**
 - o Di d'informaziun per la populaziun cun saver prender investa la davosa gada dil Hotel Acla da Fontauna
- **Gliendisdis, ils 28 d'uost 2023**
 - o Entschatta dalla spazzada dil Hotel Acla da Fontauna.

Quei ein novitads fetg legrevilas ed impurtontas per nossa vischnaunca.

Gerau Clemens Berther:

La suprastonza communal ha eligiu Marco Manetsch, Mumpé Medel sco niev collaboratur pil menaschi tecnic e successur da Claudio Albin. Marco Manetsch ha absolviu igl emprendissadi da bostger tier la vischnaunca. Suenter igl emprendissadi ha el fatg la scolaziun agricola.

Plinavon ha la suprastonza communal decidiu d'engaschar el Center Fontauna in(a) coordinatur(a) da sport en pensum da 20%. La mesadad dils cuosts surpren il cantun pils proxims quater onns.

Gerau Paul Flurin Schmidt:

La pressa pil center da rimnada a Raveras vegn furnida il matg 2023.

La presidenta dil cussegl Helga Probst-Linder:

Il 19 d'avrel 2023 ha liug la radunonza generala dalla Pleiv Sogn Gions en halla Cons.

La proxima seduta dil cussegl da vischnaunca ha liug gievogia, ils 4 da matg 2023.

Cussegl da vischnaunca Disentis/Mustér
La presidenta: L'actuaara:

Helga Probst-Linder

Ursina Murer-Fatzer

Disentis/Mustér, ils 20 d'avrel 2023